

«20» դեկտեմբերի 2021թ.

ք. Երևան

Հայաստանի Հանրապետության պետական եկամուտների կոմիտեի Արարատյան մաքսատուն-վարչության պետ Կարեն Բաբայանս, ուսումնասիրելով «Հենար ֆուդ» ՍՊ ընկերության (ՀՎՀՀ՝ 03547584, հասցեն՝ Կոտայքի մարզ, Քանաքեռավան, Մրգաշենի խճղ. 30, պետական գրանցման համար՝ 80.110.1029854, տնօրեն Ջհանգիր Հենրիկի Ապրեսյան) նկատմամբ հարուցված վարչական վարույթի նյութերը,

Պ Ա Ր Զ Ե Ց Ի

«Հենար ֆուդ» ՍՊ ընկերության կողմից թիվ 05100033/090221/0003264 տարանցման հայտարարագրով ՀՀ է ներմուծվել 5,750 կգ ընդհանուր քաշով տավարի գլխամիս, ինչը, համաձայն ՊԵԿ թիվ 05/8-4/7259-2021 գրության, 10.02.2021 թվականին ժամանակավոր պահպանության է հանձնվել ընկերության կողմից վարձակալած ք. Երևան, Արին Բերդ 12 հասցեում: «Հենար ֆուդ» ՍՊ ընկերության կողմից թիվ 05100033/261220/0029491 տարանցման հայտարարագրով ՀՀ է ներմուծվել 22,230 կգ ընդհանուր քաշով սառեցված հավի միս, ինչը, համաձայն ՊԵԿ թիվ 05/8-4/82586-2020 գրության, 31.12.2020 թվականին ժամանակավոր պահպանության է հանձնվել ընկերության կողմից վարձակալած ք. Երևան, Արին Բերդ 12 հասցեում: Երկու դեպքում էլ ՀՀ ներմուծված ապրանքներն առանց մաքսային մարմնի թույլտվության ամբողջությամբ հանձնվել են: «Հենար ֆուդ» ՍՊ ընկերության կողմից ՀՀ ներմուծված ապրանքների համար սահմանված մաքսային վճարները չեն վճարվել:

ՀՀ ՊԵԿ Արարատյան մաքսատուն-վարչության ԳՀՀ բաժնի կողմից 10.11.2021 թվականին տրված տեղեկանքների համաձայն՝ «Հենար ֆուդ» ՍՊ ընկերության կողմից վճարման ենթակա մաքսային վճարների գումարը կազմում է ընդհանուր 12,094,140 ՀՀ դրամ, որից մաքսատուրք՝ 5,121,797 ՀՀ դրամ, տույժ՝ 2,378,900 ՀՀ դրամ, ԱԱՀ՝ 4,100,612 ՀՀ դրամ, տույժ՝ 492,831 ՀՀ դրամ:

Նշված փաստի առթիվ ՀՀ ՊԵԿ Արարատյան մաքսատուն-վարչությունում հարուցվել է վարչական վարույթ «Հենար ֆուդ» ՍՊ ընկերության կողմից վճարման ենթակա մաքսային վճարների գանձման նպատակով, ինչի առթիվ 2021 թվականի դեկտեմբերի 10-ին ժամը 15:00-ին հրավիրվել են լսումներ, ինչի մասին ծանուցագիրը պատշաճ կարգով ուղարկվել է, սակայն ընկերության կողմից չի ստացվել: Արարատյան մաքսատուն վարչության պետի կողմից 10.12.2021 թվականին կայացված «Վարչական վարույթի ժամկետը երկարաձգելու մասին» որոշմամբ «Հենար ֆուդ» ՍՊ ընկերության նկատմամբ հարուցված վարչական վարույթի ժամկետը երկարաձգվել է 10 օրով՝ մինչև 20.12.2021 թվականը, և նույն որոշմամբ հրավիրվել են լսումներ 20.12.2021 թվականին ժամը 15:00-ին: Որոշումը 10.12.2021 թվականին ուղեկցական գրությամբ պատվիրված փոստով ուղարկվել է կողմին՝ միաժամանակ տեղադրվելով հրապարակային ծանուցումների պաշտոնական «azdarar.am» կայքում:

ՀՀ Սահմանադրության 60-րդ հոդվածի 8-րդ մասը սահմանում է, որ յուրաքանչյուր ոք պարտավոր է մուծել օրենքին համապատասխան սահմանված հարկեր, տուրքեր, կատարել պետական կամ համայնքային բյուջե մուտքագրվող պարտադիր այլ վճարումներ:

ԵԱՏՄ մաքսային օրենսգրքի 103-րդ հոդվածի 1-ին մասի 3-րդ կետի համաձայն՝ Ժամանակավոր պահպանման հանձնվող օտարերկրյա ապրանքների համար ներմուծման մաքսատուրքերը, հարկերը, հատուկ, հակազնագցման, փոխհատուցման տուրքերը վճարելու պարտավորությունն առաջանում է՝ ժամանակավոր պահպանման պահեստ չհամարվող վայրում ապրանքների ժամանակավոր պահպանում իրականացնող անձի համար՝ ապրանքները ժամանակավոր պահպանման հանձնելու համար ներկայացված փաստաթղթերը մաքսային մարմնի կողմից գրանցվելու պահից:

Նույն հոդվածի 3-րդ մասի համաձայն՝ ներմուծման մաքսատուրքերը, հարկերը, հատուկ, հակազնագցման, փոխհատուցման տուրքերը վճարելու պարտավորությունը ենթակա է կատարման սույն հոդվածի 4-րդ մասում նշված հանգամանքների ի հայտ գալու դեպքում:

Նույն հոդվածի 4-րդ մասի համաձայն՝ հետևյալ հանգամանքների ի հայտ գալու դեպքում ներմուծման մաքսատուրքերը, հարկերը, հատուկ, հակազնագցման, փոխհատուցման տուրքերը վճարելու ժամկետ է համարվում՝

...

3) ժամանակավոր պահպանման պահեստի տիրապետողի կամ ժամանակավոր պահպանման պահեստներ չհամարվող վայրերում ապրանքների ժամանակավոր պահպանում իրականացնող անձի համար՝

...

ապրանքների փոխանցման օրը՝ այն դեպքում, երբ ժամանակավոր պահպանման պահեստ կամ ժամանակավոր պահպանման պահեստ չհամարվող վայր հանձնված ապրանքներն ստացողին կամ այլ անձի փոխանցվել են առանց մաքսային մարմնի թույլտվության, իսկ եթե այդ օրը որոշված չէ՝ ապրանքները ժամանակավոր պահպանման պահեստ կամ ժամանակավոր պահպանման պահեստ չհամարվող վայր հանձնելու օրը:

ՀՀ հարկային օրենսգրքի 401-րդ հոդվածի 1-ին մասի համաձայն՝ հարկի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար հարկ վճարողը կամ հարկային գործակալը վճարում է տույժ՝ 0.04 տոկոսի չափով:

Նույն հոդվածի 2-րդ մասի համաձայն՝ նույն հոդվածի 1-ին մասով սահմանված տույժը կիրառվում է ժամանակին չմուծված հարկի գումարի (այդ թվում՝ հարկային հարաբերությունները կարգավորող իրավական ակտերով սահմանված դեպքերում՝ հարկային գործակալի կողմից չվճարված), հարկերի կանխավճարային գումարների, հարկային հսկողության արդյունքներով հայտնաբերված (պակաս ցույց տրված) հարկի գումարի նկատմամբ՝ դրանց վճարման ժամկետից անցած ամբողջ ժամանակաշրջանի համար, բայց ոչ ավելի, քան 730 օրվա համար:

«Մաքսային կարգավորման մասին» ՀՀ օրենքի 115-րդ հոդվածի 2-րդ մասի համաձայն՝ Մաքսատուրքի, հարկերի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար վճարողից գանձվում է

տույժ՝ ժամանակին չվճարված մաքսատուրքի, հարկի գումարի 0,15 տոկոսի չափով, բայց ոչ ավելի, քան 365 օրվա համար, բացառությամբ սույն օրենքով և Միության մաքսային օրենսգրքով և իրավապայմանագրային բազան կազմող պայմանագրերով նախատեսված այն դեպքերի, երբ հայտարարատուին կամ նրա լիազորած անձին տրամադրվել է մաքսատուրքի, հարկերի վճարման հետաձգում:

«Մաքսային կարգավորման մասին» ՀՀ օրենքի 114-րդ հոդվածի 1-ին մասի համաձայն՝ մաքսատուրքի, հարկերի՝ դրանց գծով տույժերի, տոկոսների վճարման պարտավորությունը սույն օրենքով սահմանված կարգով և ժամկետում չկատարելու դեպքում դրանց բռնագանձումը մաքսային մարմինների կողմից իրականացվում է օրենքով սահմանված կարգով՝ մաքսատուրք, հարկեր վճարողի միջոցների կամ այն ապրանքների արժեքի հաշվին, որոնց համար մաքսատուրքերը, հարկերը չեն վճարվել:

Հիմքում ունենալով վերոգրյալ իրավակարգավորումների ամբողջությունը, հիմք ընդունելով թիվ 05100033/090221/0003264 և 05100033/261220/0029491 տարանցման հայտարարագրերը և ՀՀ ՊԵԿ Արարատյան մաքսատուն-վարչության ԳՀՀ բաժնի կողմից տրված տեղեկանքը՝ գտնում եմ, որ «Հենար ֆուդ» ՍՊ ընկերության նկատմամբ հաշվարկված մաքսային վճարները ենթակա են գանձման:

Ելնելով վերոգրյալից և ղեկավարվելով ՀՀ Սահմանադրությամբ, «Մաքսային կարգավորման մասին» ՀՀ օրենքով, ՀՀ հարկային օրենսգրքով և «Վարչարարության հիմունքների և վարչական վարույթի մասին» ՀՀ օրենքի 7-րդ գլխի դրույթներով՝

Ո Ր Ո Շ Ե Ց Ի

1. «Հենար ֆուդ» ՍՊ ընկերությունից հօգուտ պետական բյուջեի բռնագանձել **12,094,140** ՀՀ դրամ, որից մաքսատուրք՝ 5,121,797 ՀՀ դրամ, մաքսատուրքի տույժ՝ 2,378,900 ՀՀ դրամ, ԱԱՀ՝ 4,100,612 ՀՀ դրամ, ԱԱՀ-ի տույժ՝ 492,831 ՀՀ դրամ:
2. Որոշման մասին օրենքով սահմանված կարգով իրազեկել «Հենար ֆուդ» ՍՊ ընկերությանը:

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադասության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

ԱՐԱՐԱՏՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏ



Կ. ԲԱԲԱՅԱՆ